

編號 1 號

【爛布子歲月】李宜諭原作

六月个南臺灣，莊下个溝脣、人家屋个屋前屋背，總會脛著青青黃黃、細細粒、打到歸樹極个爛布子。又到位裁爛布子、擇爛布子、搭爛布子个時節，遐係記憶內底个好味素。

成過，阿媽在楊寮下田塍脣隈溝个所在，有種三頭爛布子。逐年五、六月，爛布子好捋啊，歇暍日个打早，阿怙仔即會用奧多拜載僱人這兜姊妹，奧多拜个行李架擱拖一臺里阿卡<sup>1</sup>，去楊寮下裁爛布子。去到楊寮下，遠遠即脛著阿公早即擎大剃刀在遐剝樹極啊，一枝一枝足大極个樹極裁落來，阿怙仔即拗大樹極拖拖共下，擱拗有爛布子个部分，一細極一細極剝落來，僱人這兜細子即鬥相共拗爛布子極檢落布袋底。落尾，阿怙仔會拗一布袋一布袋个爛布子，囤起去里阿卡載轉屋下。

轉到屋下，阿依已經在天井園一隻大腳盆啊。爛布子漕在腳盆擱拗水舀得佢滄，大家即圍著腳盆，坐在矮凳，開始擇爛布子。因為蒂頭剝莫个爛布子會有滯滯个乳，所以，兩隻手愛浸在水底，一粒一粒擇。擇好个爛布子囤在細隻盆，無愛个梗即擊在

大腳盆。兩隻手浸水浸久啊，手指个所在即會皺皮皺皮，真像老儕个手，淡薄仔得人驚。

因為愛一細極一細極直直搨、直直尋、直直擇，有時會頭那暈暈，無細義拗梗擊在細隻盆底，爛布子嘎彈出細隻盆外，清醒時正較緊拗擇好个爛布子檢轉細隻盆內底，有影係加無閒个。

滄滄一腳盆个爛布子差不多愛擇成點鐘。阿媽會拗擇好个爛布子漕在大鑊，窿樵燂火，猶不時愛攪攪个，正毋會淡鑊。爛布子煮熟啊，猶燒燒即愛舀落碗底落鹽去搭，鹽較多一層仔正會結歸埕。即恁燒手燒腳<sup>2</sup>無閒一日，一埕一埕个爛布子總算做好啊。

爛布子加葫頭煎到赤赤一等好食，後次擺摻雞卵落去煎擱較香，係細子个頭愛。僱怙仔為著討拐僱人細子食飯，即教僱人一細埕爛布子傍一大口飯，飯吞落去啊，正用頭前牙喫爛布子籽，擱用舌彈啊出，脛麼儕个爛布子籽射頭遠，所以，逐頓食飯擺若賞若食、嘻嘻哈哈。

遐站擇爛布子、西爛布子籽个日，嘛係僱永遠記在心个幸福歲月。

<sup>1</sup> 里阿卡：音 li<sup>2</sup> a ka<sup>2</sup>；外來語，兩輪拖車，可以人力拉動或連結於車輛後方。

<sup>2</sup> 燒手燒腳：音 lu shiu<sup>2</sup> lu gio<sup>2</sup>；比喻操作燙手的工作。

編號 2 號

【遐下】林伯殷原作

「投手抔出球」、「打擊者出力一推，球飛向一壘！」、「哦！一壘手跔落接殺，黏時用腳蹬轉壘包，一壘跑者毋會赴走轉一壘，再見雙殺！」「臺灣贏啊！臺灣贏啊！臺灣得著世界棒球十二強比賽冠軍！臺灣冠軍！臺灣冠軍！……」電視主播喝到喉嚨硬討失聲啊。遐下，球場个臺灣選手嘍啊、教練嘍啊、現場和電視面頭前个球迷嘍嘍啊。遐下，臺灣人全然感動，嘛真風神，因為，這陣選手實現了臺灣人打野球个百年夢想，完成了臺灣人望啊望，毋過毋識望著个心願。

日頭下，一陣炙到烏刻刻个球員在球場練球，聽教練个指導和示範，認真學習各種基本動作。練過一擺又一擺，就算流汗涔滴，衫褲溼了又燥、燥了又溼，嘛無歇睏一下。恁煞作練習，即係為著在比賽个時務會用有好个表現、好个成績。臺灣對少棒到成棒，各地各級个選手都係一路打拚起來个真材實料。好佳載恁多年，臺灣打野球个環境有改善啊，培養出恁多有名个球員，正有通栽培出恁多个人才，組恁齊勻个球隊來代表臺灣出戰。所以，有大家个長期投入，正有打贏比賽遐下个歡喜、感動和目

汁。

除了長期个打拚，嘛愛有真多成過个遐下，正會有頭尾光榮个遐下。像：嘉義農林野球隊得著甲子園亞軍、紅葉少棒隊、三級棒球隊去美國比賽著冠軍、臺灣職業棒球開始、臺灣球員加入大聯盟比賽等等。這一擺又一擺个遐下，得大家一擺又一擺來關心棒球比賽，這種熱情一直在恁人个心肝底，毋識么去，臺灣个棒球歷史正有機會寫到提十二強冠軍遐下。當然，遐下猶吉煞，因為，棒球比賽猶係會擱參加落去，相信猶有真多感動人个遐下會接落去。

臺灣人有通風神、有通得人阿腦遐下，表示大家識打拚過，像：棒球、羽毛球、晶片製造、全民健保……這兜，即係大家打拚个結果；講倒轉來，大家有打拚，臺灣人正有通風神、得人阿腦个遐下。

編號 3 號

【貓鬧鐘】徐姿華原作

因為驚會睡過頭，佢自細即有設鬧鐘個習慣，讀書個時會用鬧鐘，這滿會用手機。討睡進前先定好時間，時間一到，鬧鐘個音樂即會鳴，拗賴睡個佢對甜甜個發夢內喊醒、對燒暖個被底揪出來。得鬧鐘吵醒雖然真毋甘願，嘛總比赴毋會著上課、上班，得先生、頭家刻到臭頭較贏。

這站，佢擱加一粒鬧鐘。這粒鬧鐘真心色，有幾下種方式喊人起來，得這粒鬧鐘喊醒，心肝內毋單毋會慍悴，顛倒會嘴笑鼻嘆，歡喜甘願跳落眠床，猶會有歸日个好心情呢！係哪款個鬧鐘恁好用？哪位有通買啊？這粒鬧鐘孤行獨市、無通買，單單為佢服務定，這即係佢個貓鬧鐘——咪咪。

普通時，手機個鬧鐘鳴，佢若猶擱搵眠床，佢即會喵喵嘍直直喊，抑係用佢遐粗拚拚个舌舂佢个手，提醒佢好起來啊；擱會拗佢細細个頭那鑽入佢个手婆內，使妮討愛人掌頭。恁得人惜个動作，麼儕猶睡會落眠？黏時即跋起來，認真拗佢掌頭、掌臉身，掌到時間臨臨啊正煞。

有一日晨早，佢个手機嘎無鳴，佢猶睡到屎肫翹翹。迷迷痴

痴感覺有麼个在揪佢个褲，目珠眯眯嘎睜著咪咪用牙輕輕咬著佢个褲揪下、揪下，放落又擱來咬。佢真小心無咬著佢个腳髀，毋過，嘛拗佢喊醒啊。好佳載有佢，遐日上班正無慢到位。

擱有一擺，拜六毋使上班，佢挑持無設鬧鐘，發夢當在食大餐，結果，食肚、胸坎嘎得人砣个，感覺重重、疾疾，目珠一擘開，和咪咪四目相對，五公斤个佢企在佢个食肚面上，頭犁犁睜佢，足成在問講：「人，你毋使上班係無？猶毋較緊起來？」真壞～這粒貓鬧鐘實在真心色啊！等佢起來啊，佢會坐个直頭睜佢出出入入、無閒準備上班。等佢討出門啊，佢正尾翹高高行過來，在佢个腳脣碰兩下、喵兩聲，親像係拗佢講再見。

這隻咪咪，本來瘦夾夾在公園流浪，來佢个屋下三年，佢對驚人到親人，到這滿黏人又錫人，佢乖又即靈，實在得人惜入心。若係你嘛有一隻恁得人惜个貓，逐日做你个鬧鐘，有幾幸福你即知啊！

編號 4 號

【好得，雨落過啊】彭瑞珠原作

月光，在高高个天嶼，得薄薄、火灰柑色个雲遮躑；藏在雲後背个月娘，懶懶、無想討停動。闊闊、無麼个風浪个海面，一片恬靜，即單單，遠遠、天昏遐，兩三點仔漁船个電火，跔著無麼个想討徒步个時間曠啊曠。

海面正裡角頭个烏暗內底，一痕山蟻子恁大个鑽石碎，對海天之間順順仔駛過來。「係麼个船咧？厥電火，仰子恁細？」「哪係細，係幾下排電火層躑，有錢人个船哦！」「毋係漁船，係大船呢！」遐係貨輪，抑係風力發電个工程船咧？攞無成。佢用二十節<sup>1</sup>个速度，駛啊駛，駛到遠遠个頭前中央，得佢人睜真。

「一、二、三、四……」船面上，頭少有五排電火……，啊，係載人去寮个郵輪啦！」「佢討落南抑係上北？駛去哪個國家咧？」煞煞，提出手機，毋使攞臆啊！

根據阿古哥<sup>2</sup>个地圖，臺灣頭北个燈塔——富貴角，在倒手裡較過去一兜仔；正頭前，遐係……，啊，討去日本啦！船，就照

阿古哥講个「北方」，直直駛、駛到毋見去，留得佢人去「回想」。回想，千外儕共船遠寮个快樂，上擺，佢人嘛識定過遐船嶼頭高棧个房間，照這滿个時間來睜，係食宵夜……。

好定泥，一個烏影對倒手裡咻啊過，實在真急性！順佢咻出來个方向，路燈照个圍牆角，一個五彩个蜘蛛絲圓網，厥邊脣，咻遐隻蝶碰爛一大空。一對晟光、晟光个蜘蛛子哀，慢板慢板、恬恬在網脣睜，顛倒係佢人替佢感嘆。

唉，睜了一暗夜灰暗个海面，好駛車轉去睡啊！行到車脣正發現，青青个草坪軟松軟松<sup>3</sup>，草坪歸下都係靚嫩个細黃花。係啊，雨落過啊，薄雲開始散，滿天……攞係細細个星光；韶日，會係好天啊！

好得，雨落過，蜘蛛阿依毋使攞涿雨整網，猶有柔柔个月光、靚靚个花坪和佢做伴；佢人嘛吹著五月涼風、睜著海景，供飽毋會少蚊咧。

<sup>1</sup> 節：音 zied'；此指速率單位，定義為每小時海里數。

<sup>2</sup> 阿古哥：音 a' gu' goo'；阿古哥，此指 Google。

<sup>3</sup> 軟松軟松：音 ngien' sim' ngien' sim'；柔軟彈動的樣子。

編號 5 號

【老樟樹个春天】曾俊鑾原作

老樟樹企在路脣毋知幾多年啊，佢个樹身愛三個大人正會用圍起來，歲月在厥臉身留落永久个影跡。即像舊年熱天做颱風，足多樹極得風打斷截；矮下个泥肉嘛得水打走，彎彎翹翹个樹根得人睭現現。遐時，佢睭暴風吹到拗腰，硬硬討倒落去。前一站仔，又堵著頭冷个寒天，三日風，三日霜，在原本結疤个所在切開猶較深个空嘴。

等頭尾一擺寒流過了，曠燼直曠，鳴暗雷<sup>1</sup>，老樟樹略略仔感受著對遠方傳過來沉沉个鼓聲，遐係春天在泥下睡醒个信號。佢先擘嘴擘鼻，續落伸一下腰骨，跔風个節奏發出「喀喀」个聲。空氣內開始鼻著一種特殊个芬芳，遐係南方吹來溫暖个水氣，合著新生命黏時會暴芽个氣味。

打先係遐兜無上目个鹽酸草<sup>2</sup>和土香<sup>3</sup>，佢人有一兜仔驚見笑，對老樟樹腳下个泥底拗頭那探出來，嫩噴噴个葉掛著晶瑩个露水。老樟樹拗這兜小生命低言細語，歡喜佢人來共下迎接久違个

春光。

初春个暗頭總係有一層仔清冷，北風合震震雨不知不覺即來啊，雨點仔輕輕打在老樟樹个葉，演奏一首和諧个夜曲。這雨水滋養嘴渴个樹根，嘛洗淨一身个泥粉。過無幾久，北風恬啊，南風起，老樟樹睭著燕子跔風來，老朋友轉來啊。佢人在街路个屋簷下無閒挾掣，對溪脣銜泥整理舊年个舊藪，流線个身胚在青青个天嶼劃出優美个弧線。佢人係春天个使者，帶來對生命个祝福。

老樟樹下慢慢仔鬧熱起來。堵著燒暖个日，莊底个老儕會在樹下行棋、答嘴鼓，作穡人會憑在樹身歇睏，放學个細子會在厥四角輪轉賞辦家貨和藏膨嬰。老樟樹企到澄澄風神拄天，即像食肚挺挺个高長大漢，佢用闊闊个樹影拗佢人遮日頭，用輕輕个叟氣替佢人送涼風。

對目前个情景，老樟樹真感動，滿心歡喜。佢睭向遠方，高山嶺尾<sup>4</sup>、平洋深坑，攞換莫灰色个舊衫，濛濛个濛下腳係新色个大地。一臨風吹過來，老樟樹个樹極跔風搖啊搖，佢無堵好嘎啣睡，一曠目，幼嫩个新葉即在手指頭暴穎啊。

<sup>1</sup> 暗雷：音 am<sup>ˆ</sup> lui<sup>ˋ</sup>；悶雷。

<sup>2</sup> 鹽酸草：音 rhiam<sup>ˋ</sup> son<sup>ˋ</sup> coo<sup>ˆ</sup>；酢漿草。

<sup>3</sup> 土香：音 tu<sup>ˆ</sup> hiong<sup>ˋ</sup>；香附子。

<sup>4</sup> 高山嶺尾：音 goo<sup>ˋ</sup> san<sup>ˋ</sup> liang<sup>ˆ</sup> mui<sup>ˋ</sup>；高山山脊。

編號 6 號

【檢著一隻青鸚<sup>1</sup>】范振新原作

舊年 6 月有一日下晝，一陣西北雨過後，偈去雜貨店个路，遠遠睺著一隻毋知麼个物件在淺淺个水窟底蠕蠕動，偈煞煞行向前去睺真兜，幾時係青鸚个鳥么。

偈心肝底想，敢係頭下得大雨打落來个？跔个即聽著佢「啾～啾～啾～」个喊聲，偈頭臥臥尋，睺有厥爺哀無，嘎無尋著，又睺遐樹恁高，想討拗佢困起去嘛無法度。睺佢寒到嘟嘟顫，驚佢會死去，無奈何檢轉屋下去照顧。

遐暗，偈無睡好，因為差不多隔兩三點鐘即愛跋起來飼鳥么食水。逐擺飼佢食水个時，即用手指滴一滴水在佢个嘴脣，佢个舌即會凸出來，拗水吞落嘴。遐時，佢猶毋會曉食飼料，偈擘心會供毋會活，好佳載到第二日，佢即會討食啊。

見擺食肚枵个時，佢个頸會伸到長長，嘴擘到大大，猶會拚命喊「啾啾啾啾啾！」搶討食。偈煞煞拗飼料摻兜仔水，用細湯匙灌落去，一口、兩口、三口。鳥么逐擺攏食無多，毋過真緊即枵，所以愛輒輒飼，猶攏食飽即睡，正經係食飽睡、睡飽食。

檢轉來供無一個月，即會飛啊。青鸚學飛个時，會碰來碰去，一下碰著壁，一下碰著玻璃，即像嬰仔學行路共款，一半下會跌倒。有一擺佢又碰著啊，即嘴擘擘像失魂个樣，恬恬企在鳥籠竦無停動，得偈真擘心，檢查過後，佳載無仰子。即恁跌斷腳骨顛倒勇，著面碰著面飛，著面飛著面碰，慢慢仔，佢越來越會飛啊，速度攏真緊，有時會在桌下穿啊過，一瞞目即無睺著。佳載，佢聽識自家个名，喊一聲即會飛轉佢个手底。飛恁啊會在手婆歇睏，拗頭那藏在翼胛下睡。

青鸚係城市真輒睺著个鳥，毋過成過毋識去注意。係落尾供這隻鳥了後正發現，在偈蹣个屋脣，有影有真多。這滿若係聽著有青鸚个啾聲，偈黏時即知就近有青鸚。佢人个啾聲真有變化，逐種啾聲攏有佢个意義和目的，偈聽佢个啾聲大概即臆會出佢想討做麼个，比論講：在遐尋伴、得大隻鳥驚著、起性地个啾聲，抑係真自然、真舒適時務个啾聲，攏聽會出。

在屋下，鳥籠門偈毋識關，隨在佢飛。這滿逐日都會聽著佢真輕鬆个啾聲，即像精靈在遐唱歌个樣，「啾～」毋會歇。

<sup>1</sup> 青鸚：音 ciang<sup>ˇ</sup> di<sup>ˇ</sup>；綠繡眼。

115 年全國語文競賽臺灣客語朗讀文章高中學生組（詔安腔）

編號 7 號

### 【梨情二三事】郭亭好原作

阿公有一大片个梨園，春天个時白蓬个梨花開到鬧鬧，等到熱天橫山梨即打到墜極墜枝。成過旨有梨「高接」个技術，梨農做一下係種橫山梨。橫山梨大瓣粒皮又粗，想愛價數賣了好，包裝進前定著愛先洗過，所以在歇涼遐下，不時會睭著作穡人歸屋大細戴棉紗手爪、圍一個用水筲接水个大腳盆在遐洗大梨。

攔工時務，僱人幾下個細子會得阿公調轉去鬥相共。有一擺，表阿哥無認真洗梨正顧賞水，結果一粒像嬰仔頭那恁大粒个梨，即「哼」一聲輪落泥下，阿公睭著即喝：「恁牛頭恁牛頭！正經係生雞卵無、屙雞屎有。喊佢認真兜莫擱賞啊，嘎連靚靚个梨嘛拗佢輪落泥下，實在愛刷頭啊！」得人刻到臭頭个表阿哥，嘴嘟鼻翹毋敢擱賞。

阿媽睭著毋盼即講：「好啦、好啦！大家較認真兜，下晝渡你人共下去果菜市场賣梨！」哇！聽著會用跣去賣梨，大家个精神攏來啊。尤其係表阿哥黏時即企起來，真緊手个拗米籬內底个大梨一粒、一粒緊撿落腳盆內，包裝个時嘛特別認真。睭僱人略略仔較慢兜，佢即會像班長恁緊攔僱人。因為佢知有好食个大麵

和仙草冰在果菜市场等僱人。

下晝時頭个果菜市场鬧熱滾滾，買果子个販子像鷹个樣，目珠利利在市場內底滿哪位巡來巡去，睭哪主个梨清甜好食；若係得佢睭佻意个，即用佢尖尖个嘴，煞作拗你啄價數，啄到這兜作穡人血流血汀。毋過阿媽對自家種个梨品質真有把扼，若係販子來開个價數爭差忒多，佢定著毋肯放，有佻意个販子即來來去去行幾下擺、纏歸點鐘，毋過阿媽共款恁堅持，頭尾遐販子無奈何，即照阿媽開个價數來買貨。

僱人這幾下個細子睭著梨賣淨啊，歡喜到直頭跳，直直攔阿公、阿媽：「較緊啦、較緊啦！僱人个食肚枵到憑背脊駢啊啦！」大麵一捧來，大家即像枷囚个樣，毋驚燒、頭犁犁大口大口拚勢呷。睭僱人食到流汗浴滴，惜僱人个阿媽，總會擱喊幾下碗透心涼个仙草冰得僱人食。

遐當時，傍阿公、阿媽个笑容，和叔伯兄弟共下搶槽个好味素，這滿，毋管哪位个有名大麵擔、仙草擔，嘛攏尋毋會轉啊！

編號 8 號

【擘鹽个西瓜】黃美貞原作

佢一直記得細子人个熱天，係對一粒西瓜開始个。

遐年佢讀小學三年，阿依在菜園圍一細埕地，講自家討種幾下頭西瓜來食，會用省一兜仔買果子个錢，又會用少食一兜仔四秀。第一擺睭遐頭細細个西瓜秧，葉皮毛散散，生真慢，逐日放學第一件事情即係跔在佢个脣頭，睭佢有變較大一兜仔無。遐年熱天特別熱，日頭炙到泥下會燒人。佢攞細隻鉛桶去沃水，攞用舊雨傘拗佢遮日頭，小心細義來照顧。

叔婆睭著佢逐日無閒挾掣，笑笑講：「你種西瓜比佢猶較認真哦！」種瓜來講，叔婆係老經驗啊，逐年熱天，佢總會擇兜仔自家種个西瓜來賣。佢用畚擔擔菜籃，一裡園一粒西瓜，伙房內个人當晝食飽在竹頭下坐寮个時務，佢即切一賺賺得大家食望。遐沙沙又甜甜个氣味，大家相賽注文，兩下半即應淨淨啊。

佢種个西瓜總算在歇熱遐時開花，結果，遐日，氣象報導講颱風討來啊，阿怙仔小心細義去田拗佢掙轉來，先園在屋簷下，佢拗大西瓜掇个毋肯放，直直講毋盼破來食。暗頓食飽，歸屋下人坐在禾坪答嘴鼓，阿依擎出一支利利个長刀，輕輕拗破開，佢

即一路必開。紅漬漬个瓜瓢，攞有烏金烏金个西瓜籽排到齊齊，紅紅个西瓜汁即直直流落來。

佢等毋會赴阿依切，攞緊糝一坭塞落嘴。甜係甜，毋過比起叔婆賣个，又感覺攞差一屑仔。阿依若笑若搖頭，對灶下提出一細碟鹽，「來，擘一兜仔鹽試睭望。」雖然感覺真帶疑猶係照做。無想著，咬一口，西瓜正經變甜啊。遐年過後，屋下會種幾下頭西瓜秧。雖然毋係粒粒好，有時生到稞稞、有時得蟲咬，擘兜仔鹽落去，遐西瓜即係童年記憶內底頭清甜个味素。

這滿个西瓜大體對外地載來，外皮金金靚靚、口感共樣，猶有頓合格个紅印子，毋過佢總係感覺欠麼个物件，少了遐種自家種瓜時个期待、日頭下流汗滂滴个辛苦。因為正經个甘甜，係藏在平凡內，愛一兜仔鹽，正食會出來。

編號 9 號

【比手機較智慧】李淑娟原作

手機手機，人手一機！現代個學生大討攞會用講係低頭族，火車頭、捷運站、公車內，無論坐個抑係企個，耳機一掛手機一滑，網路世界五花八色，像毒品共樣錫人，頭犁犁埋在內底無想討出來。

國中出業週年，考試個成績猶罔罔，阿怙送佢一支智慧型個手機，交代講愛利用佢好好學習。睺著遐時行個色地，猶有後背一粒缺角個蘋果、專業個三個鏡頭，佢連個幾下日暢到毋使食飯，單淨笑都會飽。

高中生活強調自主學習，無人顧個讀書交作業，想討讀幾多內容、愛加強哪個科目攞愛靠自家規劃，加上先生無恁嚴，得線上遊戲錫著個佢一下失算，尋毋會著學習個動力、讀書個目標，作業拖死過日無寫、無做、無交。講嘛怪奇，頭新個流行歌曲聽過幾下遍佢即會唱，較難個遊戲賞過一擺即真熟手，毋過聽先生講事即像鴨聽雷共款，上課啄睡、坐蹠直舂米<sup>1</sup>。

睺佢逐日顧手機，一離開手機即應嘴應鼻起性地，輒輒半夜

翻點啊嘛毋睡，偷偷囡囡措被賞到俛天光，阿依心焦失魂唸講：「攞賞落去，目珠會青暝哦！」毋知清醒個佢總係倒裡耳子入，正裡耳子出，想著奸計——假影屙屎藏入便所賞，確實係老儕事講个：「懶尸人無屙無通奈！」一暗愛屙兩三擺，一擺愛屙歸點鐘，無屙到阿依來推門定著毋會出來。

一直愛到考試个前一禮拜正會開始擘心，坐在書桌頭前掀開新點點个課本，嘎毋知愛對哪跡位開始讀，咬牙目結原子筆擎蹠，頭那疾到硬硬討斷腦筋。過無兩日个好光景，想討拚个決心像風恁輕，讀書个計畫比紙較薄，數學哪有遊戲恁心色，英文廣播哪有音樂恁好聽，懊惱个佢又開始滑手機尋快樂啊。用腳膝頭想嘛知，學期煞个時，幾下科無及格，化學連補考个機會都無，唉！實在真見笑。

阿媽講過：「輸一擺，總毋好攞輸第二擺。」這滿佢正知，人愛比手機較有智慧，拗佢用來做鬥相共學習个辛勞，毋係變爛死時間个主人。好好管理時間，規劃學習个節奏，尋出自家个方向，認真讀書人生正毋會輸。

<sup>1</sup> 直舂米：音 chid` zhung` mi`；形容人打瞌睡一直點頭的樣子像前人打米的動作。

115 年全國語文競賽臺灣客語朗讀文章高中學生組（詔安腔）

編號 10 號

【行出去，正有風景】范振新原作

在臺灣，有人講人生在世有三件事情定著愛做：跋玉山，泗過日月潭，猶攔騎鐵馬環島。雖然講，這兜攏無恁簡單，愛堅耐攔愛有體力正會奈何。嘛有人講，遐恁恁个事情，艱難受苦，食飽傷閒係無？毋過，猶係有越來越多人相賽去挑戰自家。阿宏嘛共款，拗這三件事情，準做佢人生个目標。

自細，阿宏厥怙總會講：「做人做事愛有膽，毋識做過个就愛去試，無試仰子會知！」厥怙會恁講，即係希望阿宏愛培養勇敢面對困難个自信，即像人講：「敢去即一擔樵，毋敢去即屋下愁。」所以，厥怙真鼓勵佢趁少年身體較勇个時，去挑戰人生。受著厥怙个影響，阿宏 18 歲生日遐日，即鐵馬騎个，單人獨馬走去環島。

出發遐日一色青天，打早阿宏著一身運動个衫褲，騎屋下遐臺已經覘臺灣兩輪个鐵馬準備出發。無毋著，這臺鐵馬雖然毋係真高級，毋過真耐戰，佢兩個阿哥攏係騎這臺鐵馬去環島，恁多年來毋識壞。出發進前，單淨加鬥个車架囡包袱，攔拗輪灌風即出門。無特別安排路線，嘛無按算一日愛騎幾遠，即跔自家个心

情來行。

這擺環島無先撥工規劃，正經係「時到時當，無米煮番薯湯」。有幾下日佷暗啊猶旨決定愛在哪位歇暍，臨時臨急正上網尋。壞啊！遐日騎到臺東，堵好堵著歇暍日，又無先注文，問幾下間旅社嘎攏無房間，高不將走去海脣个沙坪睡。雖然沙坪無眠床恁自然，毋過，脣頭無別儕，恬靜恬靜，正聽會著海湧个聲一陣一陣，四角輪轉暗摸摸，天嶼个星一曠一曠。這暗，阿宏即在這滿天星光个美景內睡去啊。

第二日天甫光，阿宏坐在沙坪，遠遠睭著遐火紅色个大卵石對海底鑽出來，愈來愈大、越來越光。睭著這天闊地闊个光景，阿宏在心肝內想：有一兜路，無行過，你毋知風景在哪位；有一兜事情，無親身去做，你定著毋知自家會用行幾遠。